

四庫全書

子部

欽定四庫全書

冊府元龜卷五百二

宋王欽若等撰

邦計部

平糴
常平

平糴

孟子曰犬彘食人食而不知檢塗有餓莩而不知發蓋
譏其不以法度簡斂也是知善為國者當平豐之歲為
凶荒之儲所以順天道備寇賊而紓農人務政本也夫

世有饑穰天之行也邦之經費既不可闕民之資奉於是乎在或上熟而不收惡歲而亡備烏謂夫能通其變者也若乃權其輕重制其物宜則平糴之法存焉所以操其柄下得其利農夫不困國用常足者亦繇是焉古之知治道者常從事於斯矣歷代而下咸可述焉

管仲齊大夫也桓公問於管子曰吾欲守國財而無稅於天下而因可乎仲對曰昔武王為巨橋之粟貴糴之

數

武王既勝殷得巨橋粟欲使糴貴巨橋倉在廣平郡曲周縣

立重泉之戍

戍名也重文恭

切假設此戍名欲人
憚役而竟收粟也

令曰民自有百鼓之粟者不行民

舉所聚粟以避重泉之戍而國穀二什倍巨橋之粟亦

二什倍武王以巨橋之粟二什倍而市繒帛

雜錄
曰繒

軍五

歲無藉衣於人以巨橋之粟亦二什倍而衡

平也

黃金終

身無藉於人桓公又曰齊西水潦而民饑齊東豐庸而

糴賤欲以東之賤被西之貴為之有道乎管子曰今齊

西之粟釜

五鉅
為釜

百泉則鉅二十也

斗二升八合曰鉅
烏侯切泉錢也

齊

東之粟釜十泉則鉅二錢也請以令籍人三十泉得以

五穀菽粟決其籍若此則西出三斗而決其籍齊東出三釜而決其籍然則釜十之粟皆實於倉廩西之人饑者得食寒者得衣若此則東西之相被遠近之準平矣

君下令稅人三十錢准以五穀令齊東之人納三釜以賑西之人則東西俱平矣管子智用無窮以區區之齊一匡天下本仁祖義成其霸業所行權術因饑而發非為常道也故別篇云偏行不去盡也 桓公又

曰糴賤寡人恐五穀之歸於諸侯寡人欲為萬人藏之為此有道乎管子曰今者夷吾道市有新成困京者二

家

大國曰京

君請式壁而聘之

式用也壁玉也聘問也使玉人刻石為壁尺者萬象八寸

者八千七寸者七千是也賜之以壁仍存問也

行令半年萬人舍其業而為困

京以藏菽粟者過半

魏文侯相李悝曰

悝音魁

糴甚貴傷人

此人謂士工商

甚賤傷農

人傷則離散農傷則國貧故甚貴與甚賤其傷一也善

為國者使人無傷而農益勸今一夫挾五口理田百畝

歲收畝一石半為粟百五十石除十一之稅十五石餘

百三十五石食人月一石半五人終歲為粟九十石餘

有四十五石石三十為錢千三百五十除社閭常新春

秋之祠用錢三百餘千五十衣人率用錢三百五人終

歲用千五百不足四百五十

少四百五十不足

不幸疾病死喪

之費及上賦斂又未與此此農夫所以常困有不勸耕之心而令糶至於甚貴者也是故善平糶者必謹觀歲

有上中下熟上熟其收自四餘四百石

平歲百畝收百五十石今大熟

四倍收六百石計人終歲長四百石官糶二百石此為糶三舍一也

中熟自三餘三百石

自三四百五十石也終歲長三百石官糶其二百石此為糶二而舍一

下熟自倍餘百石

自倍收三百石終歲長百石官糶其五十石云下熟糶以謂中分百石之一

小饑則收百石

平歲百畝之收收百五十石今
小饑收百石收三分之二也

中饑七十石

收二分

大

饑三十石

收五分之一也以此
準之大小中饑之率

故大熟則上糴三而舍

一中熟則糴二下熟則糴一使人適足價平則止小饑

則發小熟之所斂

官以斂
藏出糶

中饑則發中熟之所斂大饑

則發大熟之所斂而糶之故雖遇饑謹水旱糶不貴而
人不散取有餘以補不足也行之魏國國以富強

晉武帝欲平一江表時穀賤而布帛貴帝欲立平糶法
用布帛市穀以為糧儲議者謂軍資尚少不宜以貴易

賤泰始二年帝乃下詔曰夫百姓平豐則用奢凶荒則窮賈是相報之理也故古人權量國用取贏散滯有輕重平糴之法理財均施惠而不費之善政者也然此事久廢天下希習其宜加以官蓄未廣言者異同財貨未能通達其制更令國寶散於穰歲而上不收貧弱困於荒年而國無備豪人富商挾輕資蘊重積以管其利故農夫苦其業而末作不可禁也今者省徭務本並力墾殖欲令農功益登耕者益勸而猶或騰踴至於農人並

傷今宜通糴以充儉法主者平議具為條制然事竟未
行

南齊武帝永明五年詔曰善為國者使民無乏而農益
勸是以十一而稅周道克隆開建常平漢載惟穆岱畎
絲泉浮汶來貢杞梓皮革必緣楚徃自水德將謝喪亂
彌多師旅歲興饑饉代有貧室盡於課調泉貝傾於絕
域軍國器用動資四表不因厥產咸用九賦雖有交貿
之名而無潤私之實民咨塗炭實此之繇昔在開運星

紀未周餘幣尚重農桑不殷於曩日粟帛輕賤於當年
工商罕兼金之儲匹夫多饑寒之患良由園法久廢上
幣稍寡所謂民失其資能無匱乎凡下貧之家可蠲三
調二年京師及四方出錢億萬糴米穀絲綿之屬平和
其價以優黔首遠邦常市雜物非土俗所產者皆悉停
之必是歲賦攸宜都邑所乏可見直和市勿使逋刻
後魏鹿念前廢帝普泰中為右光祿大夫兼度支尚書
河北五州和糴大使

後周武帝建德三年正月詔以往歲年穀不登民多乏
絕令公私道俗凡有貯積粟麥者皆准口聽留以外盡
糴

唐則天證聖元年三月二十一日勅州縣軍司府官等
不得輒取和糴物亦不得遣人替

玄宗開元二年閏二月十八日勅年歲不稔有無須通
所在州縣不得閉糴各令當處長吏簡校

十六年九月詔曰如聞天下諸州今歲普熟穀價至賤

必恐傷農加錢收糴以實倉廩縱逢水旱不慮阻饑公私之間或亦為便令所在以常平本錢及當處物各於時價上量加三五錢百姓有糴易者為收糴事須兩和不得限數配糴訖具所用錢物及所收糴物數具申所司仍令上佐一人專簡校

二十五年九月戊子勅曰適變從宜有國常典恤人濟物為政所先今歲秋苗遠近豐熟時穀既賤則甚傷農事資均糴以利百姓宜令戶部郎中鄭昉殿中侍御史

鄭章於都畿據時價外每斗加三兩錢和糴粟三四百萬石所在貯掌江淮漕運固甚煩勞務在安人宜令休息其江淮間今年所運租停其闕輔委度支郎中兼侍御史王翼准此和糴粟三四百萬石應須船運等即與所司審計料奏聞

二十六年三月丙申勅曰如聞寧慶兩州小麥甚賤百姓出糴又無人糶衣服之間或慮難得宜令所司與本道支使計會每斗加於時價一兩錢糶取二萬石變造

麥飯貯於朔方軍城

二十七年九月勅曰理國者在乎安人安人者在乎足食以古先哲后立法濟時使家有三載之儲國有九年之蓄雖遇水旱終保康寧則堯湯之代繇此道也朕以薄德丕承睿圖身雖在於九重心每同於兆庶而微誠克遂上帝降祥今歲物已秋成農郊大稔豈但京坻之積有同水火之饒宜因豐穰預為收貯濟人救乏孰先于茲宜令所司速計料天下諸州倉有不充三年者宜

量取今年稅錢各委所繇長官及時每斗加於時價一兩錢收糶

天寶四載五月詔曰如聞今載收麥倍勝常歲稍至豐賤即慮傷農處置之問事資通濟宜令河南河北諸郡長官取當處常平錢於時價外斗別加三五錢量事收糶大麥貯掌其義倉亦宜准此仍委採訪使勾當便勘覆具數一時錄奏諸道有糧儲少處各隨土宜如堪貯積亦准此處分

肅宗上元元年九月勅先緣諸道閉糴頻有處分如聞所在米粟尚未流通宜令諸節度觀察各於管內捉搦不得輒令閉糴

代宗大歷八年十一月癸未勅度支江淮轉運三十萬石米價并脚價充關內和糴時京師大稔穀價驟賤大麥斗至八錢粟斗至二十錢帝勤卹萬姓思以贍之以每歲漕輓四十萬石米至上郡乃量遠近費減至十萬石三十萬石米價充關內近加價和糴以利關中人權

也庚子詔京官職田一切官為收糶令度支估以聞度支奏估直五萬貫詔加至八萬貫以來估時賤寵百官也

九年五月庚申以時屬年豐理國之本莫先兵食乃詔度支支七十萬貫諸道轉運使支五十萬貫充和糶

十一年六月十三日勅自今已後所在一切不得閉糶及隔截權稅

德宗興元元年閏十一月詔曰江淮之間連歲豐稔迫

於供賦頗亦傷農收其有餘濟彼不足宜令度支於淮南浙東浙西道加價和糴米三五十萬石差官船運於諸處減價出糴貴從權便以利於人

貞元元年正月詔諸州府不得輒有閉糴

二年十月度支奏京兆河南河中同華陝虢晉絳鄜坊丹延等州府秋夏兩稅青苗等錢物悉折糴粟麥所在儲積以備軍食京兆府兼給錢收糴每斗於時價外更加十錢納於大倉詔可其奏自是每歲行之以贍軍國

十一月度支奏請於京兆府明年夏秋稅二十二萬四千貫文又請度支給錢添成四十萬貫令京兆府今年內收糴粟麥五十萬石以備軍食詔從之

三年閏五月度支奏河南河中府及同華晉絳陝虢鄜坊丹延等州今年夏稅各送上都及留州留都府錢八十一萬貫請量取三十萬貫折糴豆麥等貯納仍委和糴使兵部郎中姚南仲勾當從之

四年九月詔京兆府於時價外加和糴差清強官先給

價直然後貯納續令所司自搬載送大倉並差御史訪
察有違勅文當重科貶先是多被折物或估踰時價或
先斂而不訓追集停擁割斂運納遠近怨苦故有是詔
八年十月以西北邊穀賤詔令度支增價和糴以實邊
儲凡積米三十三萬斛

九年正月詔曰分災救患法有常規通商惠人國之令
典自今宜令州府不得輒有閉糴仍委鹽鐵使及觀察
使訪察聞奏

十六年十月勅京兆府今年和糴粟一百萬數內宜減三十萬

憲宗元和七年七月戶部侍郎判度支盧坦奏今年冬諸州和糴貯粟澤潞四十萬石鄭滑易定各一十五萬石夏州八萬石河陽一十萬石太原二十萬石靈武七萬石振武豐州鹽州各五萬石凡一百六十萬以今秋豐稔必資蓄備其澤潞石易定鄭滑河陽委本道差判官和糴各於時價每斗加十文所冀人知勸農國有常

備從之

八年九月癸丑權判度支兵部尚書王紹奏請折糶粟
京兆府二十五萬石同州五萬石華州三萬石陝州五
萬石虢州三萬石河中府三萬石絳州二萬石河南府
六萬石河陽節度管內十萬石准舊仍各於本州處中
旬時估每斛加饒五之一京兆府量加五之二以當府
秋稅青苗錢折納仍委戶部以不折估足段據數俱還
從之

穆宗長慶元年三月勅春農方興種植是切其京西京北和糴使宜勒停先是度支以邊儲無備請置和糴使經年無序徒擾邊人故罷之

七月十八日大赦制近邊所置和糴皆給實價如聞頃來積弊頗甚美利益歸於主掌善價不及於村閭或虛招以奉於強家或廣僦用盜於游客若不嚴約弊何可除宜委度支精擇京西京北應供軍糧并和糴院官并營田水陸轉運切加訪察仍作條流檢括速具奏聞

四年七月乙丑丁卯勅近日訪聞京城米價稍貴須有
通變以便公私宜令戶部應給百官俸料其中一半合
給足段者廻給官中所糴粟每斛折錢五十文其足段
委別收貯至冬糴粟填納大倉時人以為甚便

九月詔於關內及關東折糴粟一百五十萬石用備饑
歉其和糴價以戶部錢充收貯畢日仍委戶部管繫尋
常不得支用

敬宗寶歷元年八月勅度支於兩畿及鳳州邠涇鄜坊

同華河中陝州河陽等道共和糴折糴聚二百萬斛命
祠部郎中崔忠信等分道主之以是歲大稔故也

十二月戊辰勅如聞河東振武今年熟令博糴米十萬
斛搬送靈武收貯其價以戶部錢充

文宗太和三年九月詔以河南河北諸道頻年水旱重
以兵役而徐汴管內遭水潦如聞江淮諸郡所在豐稔
困於甚賤不免傷農州縣長吏苟思自便條約不令出
界雖無嚴榜以避詔條而商旅不通米價懸異致令水

早之處種食無資昔春秋之時列國異政分災救患猶載冊書况今朝典大行遠近一統禁錢閉糴具在赦文宜令御史臺諫御史一人於河南巡檢但每道每州界首物價不等米商不行即時潛有約勒不必更待文榜為驗便具事狀及本貫刺史縣令察判名聞如河南通商旅之後淮南諸郡米價漸起展轉連接之處直至江西湖南荆襄已來並須約勒依此舉勘聞奏仍各令觀察使審詳前後赦條與御史切加訪察不得容蔽

四年七月甲子內出綾絹三十萬足付戶部充和糴
八年八月戊申詔曰歲有歉穰穀有貴賤權其輕重須
使通流非止救災亦為利物同州諸縣至河中晉絳京
西北豐熟之處宜令近京諸道許商興販往來不得止
過

開成元年閏五月己卯帝御紫宸殿謂宰臣曰京兆府
請開場收麥何如李固言曰但優饒百姓則易糴今年
百姓雖放兩稅亦須聽其收貯自為歲計但情願出糴

即加於時價收之鄭覃曰不強其所不欲加價收糴人
自樂輸

十月戶部請和糴粟一百萬石

三年九月丙辰朔中書門下奏請配諸道收糴粟一百
萬石以備凶年甲申詔令戶部差官京西東都河中
共糴粟六十萬石各於當處收貯以備水旱

宣宗大中六年五月勅自收關隴便討黨項邊境生人
皆失活業連屬艱食遂不寧居兼軍儲未得殷豐切在

多贍助今年京畿及西北邊稍似時熟即京畿人家競搬運斛斗入城收為蓄積致使邊塞粟麥依前踴貴兼省司和糴亦頗艱難其弊至深須有釐革其京西北今年夏秋斛斗一切禁斷不得令入京畿兩界其年六月勅近斷京兆北斛斗入京如聞百姓多端以麵造麩入城貿易所費亦多切宜所在嚴加覺察不得容許

懿宗咸通七年八月戶部奏請開和糴勅曰自數年江淮頗為饑歉今年稼穡稍似豐穰國家比為傷農是開

和糴如聞積弊繼有多端善價不及鄉閭美利皆歸司局徒為名目不益公私委戶部自此擇人深須峻法稍循前弊必罪所司史官曰和糴之文累朝承弊

大和中華州刺史宇文弼戶部員外郎盧允中右司員外判戶部姚康以分使和糴錢八萬貫其巡司李孚楊洵美各杖一百允中等悉配邊蓋此法未得中也惟白居易元和時為右拾遺上疏論和糴事其理最當辭云臣伏見有司以今年豐熟請令畿內及諸州和糴將收

錢穀當利農夫以臣所觀有害無利何者凡曰和糴是官出錢人出穀兩和商量然後交易也比來和糴事殊不然但令府縣之官散配人戶促力程限嚴加徵催苟有稽遲即被捉搦迫蹙鞭撻甚於賦稅和糴之名乃為虛設故曰有害無利也今若有司出錢開場自糴比於時價稍校饒利誘人人若見利自然遠近爭來利害之間可以比辨苟除前之弊行此之宜是真得和糴利人之道也二端取捨伏惟聖旨裁之必不得已即不如折

糴者折青苗稅錢使直納斛斛免令賤糴別納見錢在
農人亦甚為利況度支和糴多是雜色足帛百姓多須
轉賣然將納稅錢至於給付不免侵牟貿易不免損折
所失過半其弊可知今若量折稅錢納斛斛既無賤糴
粟米之費又無轉賣足段之勞利歸於人美歸於上則
折糴之便豈不昭然繇是而論則配戶不如開場和糴
不如折糴亦甚明矣臣久處村閭曾為和糴之戶親被
感迫實不堪命臣近為畿尉曾領和糴之司親自鞭撻

所不忍視臣頃者常疏此人病聞於天聰疎遠賤微無
因上達今幸居禁職列在諫官苟有他聞猶合諫獻况
備諳此事深知此弊臣若緘默隱而不言不惟上辜聖
恩實亦下負夙願猶慮愚誠不至聖鑒未迴即望令左
右可親信者一人潛問鄉園百姓和糴之與折糴孰利
而與孰害乎則知臣言不敢苟耳或陛下以勅命已行
難於移改以臣愚懇則又不然夫聖人之舉事也唯務
使人唯求利物若損益相半則不必遷移若利害相懸

則事須追改不獨於此其他亦然

十月二十三日御史臺奏今後如有所在閑糴者長吏必加貶降本判官錄事叅軍並停見任書下考仍勒所在州縣各於版榜寫錄此條懸示百姓每道委觀察判官每州府委錄事叅軍勾當逐月具不閑糴事繇申臺從之

後唐莊宗同光三年閏十二月十九日勅今歲自京已東水潦為患物價騰踊人戶多於西京收糴斛斗近聞

京西諸道州府逐斛皆有稅錢遂不通行乃同閉糶宜
令各下京西諸道州府凡閉糶斛不得輒有稅索及
經過水陸關坊鎮縣妄有邀詰

四年正月壬戌詔曰輦轂之中郊甸之內時物踊貴人
戶饑窮訪聞自陝已西遐及邠鳳積年時熟百穀價和
縱未能別備於貢輸亦宜廣通於和糶近聞輒有稅索
已曾降勅指揮尚恐關鎮阻滯行塗增長物價仰所在
長吏切加檢御以濟往來推救災卹患之心明奉國憂

人之道又京圻之內自張全義制置已數十年每聞開墾荒蕪勸課稼穡曾無歉歲甚有餘糧公私貯蓄及多收藏未肯出糴更俟厚價頗失衆情宜令中書門下條流應在京及諸縣有貯斛斗並令減價出糴以濟公私如不遵行即仰聞奏別具檢括仍委河南府切詳勅命處分

明宗天成二年八月乙酉中書舍人張文寶上言今歲時雨不愆秋苗倍熟應大熟處望下勅收糴以備歉歲

末帝清泰元年七月詔鳳州禁糶出外界

晉高祖天福二年十一月大理少卿路阮上言臣聞却敵者兵強兵者食兵不強無以驅除禍亂食不足無以贍濟國家方今海內未平寰中多事制叛則必攻必討壯國在足食足兵臣伏見天下諸州府舊穀尚賤新穀又登旣漸豐饒例難糶貨臣請國家每隆大計須作預防時當小稔之年可設無窮之備伏請取天下州府錢帛數逐年支計外委逐處長吏於津要處差清白官收

糴粟一色別厰積貯以備荒年若在豐穰之日未見優
長如逢饑饉之時方明利濟疏奏不納時輦下養兵數
廣於前衣食又倍之猶是合諸藩上供不足以充費間
以畝稅並折徵縑帛倉廩曾無兼年之蓄至廢帝嗣位
大蝗起率百姓口食天下一空俄致戎人南牧幸其國
虛故也

周太祖廣順元年四月勅天災流行分野代有苟或閉
糴豈是愛人宜令沿淮渡口鎮鋪不得止淮南人糴易

三年七月勅浚淮諸州點檢淮南人所糴糧食如是以
驢騾為馱及人負擔即仰放過不得以舟車輦運過淮
先是淮南大旱井泉涸竭太祖愍之命許博羅至
是聞吳人收糴入官以備軍食遂詔止輦運過淮

常平

夫歲有凶穰故穀有貴賤令有緩急則物有重輕始自
列國李悝起平糴之法至於漢世壽昌建常平之制裁
之得宜馭之有道雖復天災流行水旱作沴而穀有常
價民無饑色其後迫於羣議乃從中輟永平之歲遵用

舊典市糴益賤廩庾充積既而罷焉晉氏之後南北更
主或建置有初或評論靡決名稱之際因革或殊經制
之方損益小異汔于隋室復有義倉社倉之名唐祚延
久條式咸著朱梁五代干戈未息楊雄奏議亦頗及之
原其立法之意誠以均節貨幣之高下防虞稼穡之豐
歉調盈虛而御國用謹聚散而濟民命管子所謂多則
賤寡則貴散則輕聚則重真得治財之術哉夫為邦者
不可以不務也

漢宣帝五鳳中大司農中丞耿壽昌奏言故事歲漕關東穀四百萬斛以給京師用卒六萬人宜糴三輔弘農河東上黨太原郡穀足供京師可以省漕卒過半帝從之壽昌遂白令邊郡皆平倉以穀賤時增其價而糴以利農穀貴時減價而糴名曰常平倉以給北邊民便之帝廼下詔賜壽昌爵關內侯

元帝即位天下大水關東尤甚二年齊地饑民多餓死諸儒多言常平倉可罷帝從其議

後漢明帝即位天下安寧民無橫後歲比登稔永平五年作常平倉立粟市於城東粟斛直錢三十府廩還積一云永平十一年明帝欲置常平倉公卿議者多以爲便屯騎校尉劉般對以常平倉外有利民之名而內實侵刻百姓豪右因緣爲奸小民不能得其平置之不便帝乃止

晉武帝泰始四年立常平倉豐則糴儉則賣以利百姓咸寧二年起大倉於城東常平倉於東西市

宋沈曇慶爲右丞時歲有水旱曇慶議立常平倉以救民急太祖納其言而事不行

南齊永明中天下米穀布帛賤武帝欲置常平倉市積
為儲六年下詔兼尚書右丞李珪之等叅議出上庫錢
五千萬於京師市米買絲綿綾絹布揚州出錢千九百
一十萬南徐州三百萬各於郡所市糴南豫州二百萬
市絲綿綾絹布米菽麥江州五百萬市米胡麻荊州五
百萬郢州三百萬皆市絹綿布米大小豆大麥胡麻荊州米
兼粳粟湖州二百萬市米布蠟同州二百五十萬西豫
州二百五十萬南兗州二百五十萬雍州五百萬皆市

絹綿布米南兗州兼大麥大豆使臺傳並於所在市易
後魏孝文太和十二年詔羣臣求安民之術有司上言
請折州郡常調九分之二京都度支歲用之餘各立官
司豐年糴貯於倉時儉則私之糶之於民如此民必相
力田以買官絹貯錢以取官粟年登則常積歲歉則
直給帝覽而善之尋施行焉自此公私豐贍雖時有水
旱不為患也

二十年十二月置常平倉

東魏孝靜天平中常調之外隨豐稔各處折絹糴粟以充國儲於本州緣河津濟皆官倉貯積以擬漕運自是之後倉廩之實雖有水旱凶饑之處皆仰開倉以振元元之衆

北齊武成河清三年定令諸州郡常別置富人倉初立之日准所領中下戶口數得支一年之糧逐當州穀價賤時斟量割當年義租充入穀貴下價糴之賤則還用所糴之物依價糴貯

後周太祖初為魏相創制司倉掌辨九穀之物以量國用國用足蓄其餘以待凶荒不足則止餘用用足則以粟貸人春頒之秋歛之

隋開皇三年陝州置常平倉京師置常平監

五年五月詔置義倉時度支尚書長孫平見天下州縣多罹水旱百姓不給奏令民間每秋家出粟麥一石以下貧富為差等儲之間里以備凶年名曰義倉因上書曰臣聞國以民為本民以食為命勸農重穀先王命軌

古者三年耕而餘一年之積九年作而有三年之儲雖水旱為災而民無菜色皆繇勸導有方蓄積先備者也

去年亢陽闕右饑餒陛下運山東之粟置常平之官開發倉廩普加賑賜大德鴻恩可謂至矣然經國之道義資遠算請勅諸州刺史縣令以勸農積穀為務帝深嘉

納自是州里豐衍民賴焉

一云長孫平請令諸州百姓及軍人勸課當社共立義倉

收穫之日隨其所得勸課出粟及麥於當社造倉窖貯之即委社司執帳簡會每年收積勿使損敗若時或不熟當社有餓饉者

即以此數贖給

十五年以義倉貯在人間多有費損下詔曰本置義倉止防水旱百姓之徒不思久計輕爾費損於後之絕又北境諸州異於餘處雲朔夏綏靈鹽簡豐鄴涼甘瓜等州所有義倉雜種並納本州若人有旱歉少糧先給雜種及遠年粟

十六年正月詔秦疊成康武文芳宥旭洮岷渭紀河廓幽隴涇寧原敷丹延綏銀扶等州社倉並於當縣安置二年又詔社倉准上中下三等稅上戶不過一石中戶

不過七斗下戶不過四斗

仁壽二年九月置常平官

唐高祖武德元年九月四日令州縣始置社倉

是年九月二十二日詔曰朕祇膺靈命撫字黎民方緝
隆平躋之仁壽田畝之賦一切蠲除錙銖之律悉皆停
斷是以特建農圃用督耕耘思俾齊民既庶且富鍾庾
之量異同水火宜置常平監官以均天下之貨市肆騰
踴則減價而出田嗇豐羨則增價而收觸類長之去甚

去泰庶使公私俱濟家給人足抑止并兼宣通壅滯
五年十二月廢常平監官

太宗貞觀二年四月制天下州縣並置義倉先是每歲
水旱皆以正倉出給無倉之處就食他州百姓流移或
致窮困左丞戴胄上言水旱凶災前聖之所不免國無
九年之儲蓄禮經之所明誠今喪亂以後戶口凋殘每
歲納租未實倉廩隨即出給纔供當年若有凶災將何
賑恤故隋開皇立制天下之人節級輸粟名為社倉終

於文皇得無饑饉及大業中年國用不足並取社倉之物以充官費故至末途無以支給請自王公以下爰及衆庶計所墾田稼穡頃畝每至秋熟准其見苗以理勸課盡令出粟稻麥之鄉亦同此稅各納所在為立義倉若年穀不登百姓饑饉所在州縣隨便取給太宗曰既為百姓預作儲貯官為舉掌以備凶年朕非所須橫生賦斂利民之事深是可行宜下所司議立條制至是戶部尚書韓仲良奏王公已下墾地畝納二升其粟麥杭

稻之屬各依土地貯之州縣以備凶年制可之自是倉儲衍溢億兆賴焉

十三年十二月十四日詔於雒相幽徐齊并秦蒲等州置常平倉

高宗永徽二年閏九月初六日勅義倉據地稅子實是勞煩宜令衆戶出粟率上上戶五石餘各有差

六年八月京西二市初置常平倉

以大雨道路不通京師米貴

顯慶二年十二月三日京西常平倉置平署官員

自太宗以

至高宗則天數十年間義倉不許雜用其後公私窮迫
漸貸義倉支用自中宗神龍之後天下義倉費用殆盡
玄宗開元二年九月詔曰天下諸州今年稍熟穀價全
賤或慮傷農常平之法行自往古苟絕欺隱利益實多
宜令諸州加時價三兩錢糴不得抑斂仍交相付領勿
許懸欠蠶麥時熟穀米必貴即令減價出糴豆等堪貯
者熟亦宜准此以時出入務在利人江嶺淮浙劔南地
皆下濕不堪貯積不在此例其常平所須錢物宜令所
司支料奏聞並委長官專知改任日遞相付受且以天

災流行國家代有若無糧儲之備必致饑饉之憂縣令
親人風俗所繫隨當處豐約勸課百姓未辦三載之糧
且貯一年之食每家別為倉窖非蠶忙農要之時勿許
破用仍委刺史及按察使簡校覺察不得容其矯妄

四年五月勅曰天下百姓皆有正條正租州縣義倉本
備饑年賑給若緣官事使用還以正倉却填近年已來
每三年一度以百姓義倉造米遠送交納仍勒百姓私
出腳錢即并正租一年兩度打腳雇男鬻女折舍賣田

力極計窮遂即逃竄勢不獲已情實可矜自今已後更
不得以義倉回造已上道者不在停限以後若不熟之
少者任所司臨時具奏聽進止其脚並以官物充

六年三月詔曰德惟善政政在養人必將厚生阜俗利
物弘義朕奉若天命副膺王業思一物失所以百姓為
心間者河北河南頗非善熟之人糧食固應乏少頃雖
分遣使臣已領巡問猶慮鯨獨不能自存凡立義倉用
為歲備今舊穀向沒新麥未登蠶月務困田家作苦不

有惠恤其何以安宜問彼困儲時令貸給况京坻轉積
歲月滋壞因而變造為利弘多將以散滯收贏理財均
施所司明作條件俾便公私

七年六月勅關內隴右河東河北五道及荆揚襄河南
夔綿益彭蜀資漢劔茂等州並置常平倉其本上州三
千貫中州二千貫下州一千貫每糶具本利與正倉帳
同申

十六年十月勅自今歲普熟穀價至賤必恐傷農加錢

收糴以實倉廩縱逢水旱不慮阻饑公私之間或亦為便宜令所在以常本錢及當處物各於價上量加三錢百姓有糴平易者收糴事須兩和不得限數配糴訖具所用錢物及所糴得物數具申所司仍令上佐一人專勾當

二十九年制曰本制倉儲用防水旱朕每念黎庶常憂匱乏承前有遭損之州皆待奏報然始賑給近年亦分命使臣與州縣相知處置尚慮道路應遠往復淹滯以

此恤人何救懸絕自今已後若有損處應須賑給宜令
州縣長官與採訪使勘會量事給訖奏聞朕當重遣使
臣宣慰按覆

天寶四載五月詔曰如聞今載收麥倍勝常歲稍至豐
賤卽慮傷農處置之問事資通濟宜令河南河北諸郡
長官取當處常平錢於時價外斗別加三五錢量事收
糴大麥貯掌其義倉亦宜准此仍委採訪使勾當便勘
覆具數一時錄奏諸道有糧儲少處各隨土宜如堪貯

積亦准此處分

六載三月二十二日太府少卿張瑄奏准四載五月八日并五載三月十六日勅節文至貴時賤價出糶賤時加價收糶若百姓未辦錢物者任准開元二十八年七月九日勅量事賒糶至粟麥熟時徵納臣使司商量且糶舊糶新不同別用其賒糶者至納錢日若粟麥糶種等時價甚賤恐更迴易艱辛請加價便與折納

代宗廣德二年正月諸道轉運使專判度支戶部侍郎

第五琦奏天下諸州望置常平倉及庫使司商量置本錢隨當處米物時價賤則加價收糴貴則減價糶賣

德宗建中元年七月勅夫常平者常使穀價如一大豐不為之減大儉不為之加雖遇災荒人無菜色自今已後忽米價貴時宜量出官米十萬石麥十萬石每日量付兩市行人下價糶貸

三年九月戶部侍郎趙贊上言曰伏以舊制置倉儲粟名曰常平軍興已來此事浸廢因循未舉垂三十年其

間或因凶荒流散餓死相食者不可勝紀古者平準之法使萬室之邑必有萬鍾之藏千室之邑必有千鍾之藏春以奉耕夏以奉耘雖有大賈富家不得豪奪吾人者蓋謂能行輕重之法也自陛下登極來許京城兩市置常平官糴鹽米雖輕頻年少雨米價不復騰貴此乃即日明驗實要推而廣之當軍興之時與承平或異事須兼儲布帛以備時須臣今商量請於兩郡并江陵成都揚汴蘇洪等州府各置常平輕重本錢上至百萬貫

下至十萬貫隨其所宜量定多少唯貯斛斗足段絲麻等常候物貴則下價出賣物賤則加價收糶權輕重以利疲人從之贊於是條奏諸道津要都會之所皆置吏閱商人財貨計錢每貫稅二十文天下所出竹木茶漆皆十一稅之以充常平本時軍用稍廣常賦不足所稅亦隨得而盡終不能為常平

憲宗元和元年正月制歲時有豐歉穀價有重輕將備水旱之虞在權聚斂之術應天下州府每年所稅地子

數內宜十分取二分均充常平倉及義倉仍各逐穩便收貯以時糶糴務在救人賑貸所宜速須聞奏

六年二月制如聞京畿之內舊穀已盡宿麥未登宜以常平義倉粟二十四萬石貸借百姓諸道州府有乏少糧種處亦委所在官長用常平義倉米借貸淮南浙西宣歙等道元和二年四月賑貸並宜停徵容至豐年然後填納

十三年正月戶部侍郎孟簡奏應天下州府常平義倉

等斛斗請准舊例減估出糶但以名數奏申有司更不收管州縣得專達以利百姓從之

穆宗長慶二年十月詔江淮諸州旱損頗多所在米價不免踊貴宜委淮南浙西浙東宣歙江西福建等道觀察使各於本道有水旱處取常平義倉斛斗據時估減半價出糶以惠貧民

四年三月制曰義倉之制其來日久近歲所在盜用沒入致使小有水旱生人坐委溝壑永言其弊職此之繇

宜令諸州錄事叅軍專勾當苟為長吏迫制即許驛表
上聞考滿之日戶部差官交割如有欠負與減一選如
欠少者量加一選欠數過多戶部奏聞節級科處

文宗太和七年八月詔曰如聞今歲所在豐稔其義倉
斛斛先有借用處委戶部勾當並須及時填足

八年九月詔淮江浙西等道仍歲水潦遣殿中侍御史
任畷馳往慰勞以比年賑貸多為奸吏所欺徒有其名
惠不及下宜委所在長吏以軍州自貯官倉米減一半

價出糶務及貧弱如無貯蓄處即以常平義倉米糶田
苗全損處全放其年青苗錢餘亦量議蠲減

九年二月中書門下奏常平義倉本虞水旱以時賑卹
州府不詳文理或申省取裁或奏候進止自今已後應
遭水旱處先據貧下戶及鰥寡惇獨不濟者便開倉准
元勅作等第賑貸訖具數申報有司如或水旱尤甚米
麥翔貴亦任准元年勅或減價出糶熟時糶填委諸道
觀察使各下諸州重令知悉

三月制曰朕以寡德託於兆人之上雖兢兢業業思理不怠而政道多闕和氣用傷仍歲水旱黎民艱食為之父母斯心鬱陶如聞魏博六州阻饑尤甚野無青草道殣相望及山南東道陳許鄆曹濮淮南浙西等道皆困於饑疫慮乏鍾餉其魏博宜賜粟五萬石山南東道陳許鄆曹濮等三道各賜糙米二萬石充賑給委度支逐便遣淮南浙西兩道委長吏以常平義倉粟賑賜應諸道有饑疫處軍糧積蓄之外其屬度支部雜穀並令

減價出糶以濟貧人其有宰牧非才貪殘為害及承前積弊須有條流或寃獄留滯速宜踈決者並委觀察使糾察詳訪具狀聞奏用弭天責以副朕焦勞之慮

開成元年八月戶部奏應諸州府所置常平義倉伏請起今後通公私田畝別納粟一升逐年添貯義倉斂之至輕事必通濟歲月稍久自致充盈縱逢水旱之災永絕流亡之慮勅從之

十一月陳許觀察使杜悰奏陳許蔡三州常平義倉斛

斛除元數外當使添置粟一十萬石分貯三州以備水旱

十二月鹽鐵轉運使秦據江淮留後盧錮以江淮諸州人將阻饑請於來年運米數內量留收貯至春夏百姓饑乏之際減價出糶收其直待熟償之無損于官有利于人帝嘉之詔留常運米三十萬石

宣宗以會昌六年即位五月赦節年常平義倉斛斗已出百姓太和中又於常數外每畝配率一升稱防災沴

其所徵常平義倉正數都無商量如聞此色在諸州縣皆兩徵已困之人何堪重斂自今已後宜停徵太和中每畝率配之數仍令所在長吏分明曉示以絕奸欺

大中六年四月戶部奏天下州府收管常平義倉斛斗今日已後如諸道應遭災荒水旱便委長吏清強官審勘如實是水旱處便任開倉先貧下不濟戶給貸訖具數分析申奏并報臣本司切不得妄給與富豪人戶其所使斛斗仍仰錄事叅軍至當年秋熟後專勾當據數

追收填納不令違欠如州府無水旱妄有給使又不及時填貯其錄事叅軍本判官重加殿罰其長吏具銜奏聽進止所冀得濟疲民兼免欠闕從之

後唐明宗天成二年六月中書舍人張文寶請復常平倉


四年九月左補闕張昭遠奏切見今秋物價絕賤百姓隨地畝細配錢物名目多般皆賤糴供輸極傷農業既未能減放貯請加估折納斛斗稍便於民又國朝已來

備凶年之法州府置常平倉饑歲以賑貧民請於天下最豐熟處折納斛斗以倉貯之依常平法出納則國家常有粟而民不匱也疏奏不報

長興元年五月右司郎中盧導奏請置常平義倉以備凶年

漢隱帝乾祐二年太子詹事曹允昇上言國以民為本民以食為天時或水旱為災蟲蝗害稼既無九年之蓄寧救萬姓之饑天災流行古今代有而前代縱逢災歉

免至流亡益以分災恤民素有儲備臣請依古法置常
平倉請於天下京都州府租賦五斛斗上每斗別納一
升別倉貯積若凶災之處出貸貧民豐年即納本數庶
幾生聚永洽綏懷



冊府元龜卷五百二

欽定四庫全書

子部
冊府元龜卷五百三
四

詳校官中書臣丁榮祚

侍讀臣孫球覆勘

總校官庶吉士臣何思鈞

校對官中書臣陸湘

謄錄監生臣范鏞

欽定四庫全書

冊府元龜卷五百三

宋 王欽若等 撰

邦計部

屯田

夫千里餽糧士有饑色樵蕪後爨師不宿飽屯田之利
繇是興矣自漢武創制置吏卒五六萬人充國上狀條
便宜十有二事新莽偽政則立田禾將軍東漢永平亦
命宜禾都尉魏晉而下無代無之是皆因戍營田因田

積穀兼兵民之力省飛輓之勞比夫負海轉輸率三十
鍾而致一石者其利豈不博哉然而輪臺之耕龜茲曰
來迫吾國車師之墾匈奴曰必爭此地或攻擾田疇或
蕩搖邊戍募民敢徙徒垂空言調吏而行復致胥怨若
乃任峻為典農之官所在積粟鄧艾著濟河之論資食
有儲斯皆不越中區近在宇下厥功易就人靡告勞故
魏氏之致富饒晉人之能剋敵者用此道也

漢武帝太初末貳師將軍李廣利伐大宛之後西域震

懼多遣使來貢獻漢使西域者益得職謂得拜職也於是自

燉煌西至鹽澤往往起亭而輪臺渠犁皆有田卒數

百人置使者校尉領護言統領保護營田之事以給使外國者謂收

其兩種五穀以供之及匈奴昆邪王降後度河自朔方以西至今

居今音零往往通渠置田官吏卒五六萬人稍蠶食地接

匈奴以北其地相接不絕是時軍旅連出師行十二年海內虛

耗征和中貳師將軍李廣利以軍降匈奴帝既悔遠

征伐而搜粟都尉桑弘羊與丞相御史奏言故輪臺東

捷枝渠犁皆故國地廣饒水草有溉田五千頃以上處
溫和田美可益通溝渠種五穀與中國同時熟其旁國

少錐刀貴黃金絲繒可以易穀食宜給足不可乏

言以錐刀

及黃金絲繒與此旁國易穀
食可以給田卒不憂乏糧

臣愚以為可遣屯田卒詣

故輪臺以東置校尉三人分護各舉園地形通利溝渠

務使以時益種五穀張掖酒泉遣騎假司馬斥候屬校

尉事有便宜因騎置以聞

騎置今之驛馬也

田一歲有積穀募

民壯健有累重敢徙者詣田所

累謂妻子家屬

就畜積為本業

畜讀
曰蓄

益墾溉田稍築列亭連城而西以威西國輔烏孫
為使臣謹遣徵事臣昌分部行邊嚴勅太守都尉明達
火選士馬謹斥候蓄艾草願陛下遣使使西國以安其
意臣昧死請帝乃下詔深陳既往之悔不復出軍

昭帝即位初用桑弘羊前議以杆彌太子賴丹為校尉

將軍田輪臺與渠犁地皆相連龜茲貴人姑翼

龜茲
讀曰

邱慈謂其王曰賴丹本臣屬吾國今佩漢印綬來迫吾

國而田必為害王即殺賴丹而上書謝漢

始元二年八月調故吏將屯田張掖郡

調調發也故吏前為官職者令

其部率習射戰士于張掖為屯田也

元鳳四年平樂監傅介子既殺樓蘭王漢乃立尉屠者

為王

尉屠者樓蘭王弟先為質於漢

更名其國為鄯善王自請天子曰

身在漢久今歸單弱而前王有子在恐為所殺國中有

伊循城其地肥美願漢遣一將屯田積穀令臣得依其

威重於是漢遣司馬一人吏士四十人田伊循以填撫

之

填音竹刃切

其後更置都尉

宣帝地節二年詔遣侍郎鄭吉及校尉司馬意許吏切將

免刑罪人田渠犁積穀欲以攻車師至秋收穀吉意發
城郭諸國兵萬餘人自與所將田士千五百人共擊車
師攻交河城破之王尚在其北石城中未得會軍食盡
吉等且罷兵歸田渠犁收秋畢復發兵攻車師王輕
騎奔烏孫吉即迎其妻子置渠犁車師東秦事至酒泉
有詔還田渠犁及車師益積穀以安西國侵匈奴吉始
使吏卒三百人別田車師得降者言單于大臣皆曰車

師地肥美近匈奴使漢得之多田積穀必害人國不可
不爭也果遣騎來擊田者吉廼與校尉盡將渠犁田
士千五百人往田匈奴復益遣騎來漢田卒少不能當
保車師城中匈奴將即其城下謂吉曰單于必爭此地
不可田也圍城數日廼解後常數千騎往來守車師
去渠犁千餘里間以山河北近匈奴漢兵在渠犁者孰
能相救願益田卒公卿議以為道遠煩費可且罷車師
田者詔遣長羅侯

嘗惠也

將張掖酒泉騎出車師北千

餘里楊威武車師旁胡騎引兵去迺得出歸渠犁凡三

校尉屯田

匈奴傳云宣帝時西域共擊匈奴取車師國匈奴收其餘東不敢居故地而漢益遣屯士

分田車師地以實之

其後匈奴遣左右奧鞬各六千騎

奧音郁鞬音居言切

與左人將再擊漢之田車師城者不能下

神爵三年日逐王畔單于將眾來降護鄯善以西使者

鄭吉迎之既至漢封日逐王為歸德侯使吉并護北道

故號都護

都護之起自吉置也

匈奴益弱不得近西域于是徙屯

田于北胥鞬

地名

枝莎車之地

枝分也

屯校尉始屬都

護都護治烏孫壘城去陽關二千七百三十八里與渠犁田官相近土地肥饒于西域為中都護治焉

趙充國為後將軍討叛羌度其必壞欲罷騎兵屯田以待其弊上奏曰臣聞兵者所以明德除害也故舉德於外則福生於內不可不慎臣所將吏士馬牛食月用糧穀十九萬九千六百三十斛鹽千六百九十三斛芟橐二十五萬二百八十六石

芟乾芻也橐禾稗也百二十斤

難久不斛

繇役不息又恐它夷卒有不虞之變

卒讀曰倅

相因並起為

明主憂誠非素定廟勝之策且羌人易以計破難用兵
碎也故臣愚心以為擊之不便計度臨羌東至浩亶羌
虜故田及公田民所未墾可二千頃以上其間郵亭多
壞敗者臣前部士入山伐材木大小六萬餘枝皆在水
次願罷騎兵留弛刑應募及淮陽汝南步兵與吏士私
從者合九萬二百八十一人用穀月二萬七千三百六
十三斛鹽二百八斛分屯要害處冰解漕下繕鄉亭浚
溝渠

繕補也浚
深治也

治湟陘以西道橋七十所令可至鮮水

左右田事出賦人二十晦

田事出謂至春人出營田也
賦謂班與之也晦古敵字也

至四月草生發即騎及屬國軍騎伉健各千倅馬什二

就草

倅副也什二者千騎則與副
馬二百匹也伉音口浪切

為田者游兵以充入

金城郡益積畜省大費

畜讀曰蓄

今大司農所轉穀至者足

支萬人一歲食謹上田處及器用簿唯陛下裁許帝報

曰皇帝問後將軍言欲罷騎兵萬人留田即如將軍之

計敵當何時伏誅兵當何時得決熟計其便復奏充國

上狀曰臣聞帝王之兵以全取勝是以貴謀而賤戰戰

而百勝非善之善者也故先為不可勝以待敵之可勝

蠻夷習俗雖殊於禮義之國然其欲避害就利愛親戚

畏死亡一也今敵亡其美地薦草

薦稠草

愁於寄託遠遯

骨肉心離人有畔志而明主般師罷兵

般音班還也

萬人留

田順天時因地利以待可勝之敵雖未即伏辜兵決可

暮月而望羌人瓦解前後降者萬七百餘人及受言去

者九七十輩此坐支解羌人之具也臣謹條不出兵留

田便宜十二事步兵九校吏士萬人留屯以為武備因

田致穀威德並行一也又因排折羌人令不得歸肥饒

之墜

古地字

貧破其衆以成羌人相畔之漸二也居民得

並田作不失農業三也軍馬一月之食度支田士一歲

罷騎兵以省大費四也至春省甲士卒循河湟漕穀至

臨羌以賑羌人

賑亦示字

楊威武傳世折衝之具五也以閒

暇時下所伐材

閒讀曰閑

繕治郵亭充入金城六也兵出乘危

徼幸不出令反畔之敵竄於風寒之地離霜露疾疫

瘰墮之患

離遭也墮謂因寒疾而墮指者也

坐得必勝之道七也七經

阻遠追死傷之害八也內不損威武之重外不令敵得

乘間之執九也又亡驚動河南大开小开

皆羌種在河西之河南也

使生它變之憂十也治湟陘中道橋令可至鮮水以制

西域信威千里

信讀曰申

從枕席上過師十一也

橋成軍行安易若於

枕席上過也

大費既省繇役豫息以戒不虞十二也留屯田

得十二便出兵失十二利臣充國材下犬馬齒衰不識

長冊唯明詔博詳公卿議臣採擇帝復賜報曰皇帝

問後將軍言十二便聞之敵雖未伏誅兵決可暮月而

望暮月而望者謂今冬邪謂何時也將軍獨不計敵聞
兵頗罷且丁壯相聚攻擾田者及道上屯兵復殺畧人
民將何以止之又大开小开前言曰我告漢軍先零所
在兵不往擊久留得亡效五年時不分別人而并擊我
此謂本始五年伐先零不分別大小开本意是以大小开有此言也其意常恐今兵不出
得亡變生與先零為一將軍孰計復奏充國奏曰臣聞
兵以計為本故多算勝少算先零羌精兵今餘不過
七八千人失地遠客分散饑凍罕开莫須又頗暴畧其

羸弱畜產畔還者不絕皆聞天子明令相捕斬之賞臣
愚以為敵破壞可日月冀遠在來春故曰兵決可期月
而望竊見北邊自燉煌至遼東萬一千五百餘里乘塞
列隧有吏卒數千人敵數大衆攻之而不能害今留步
士萬人屯田地執平易多高山遠望之便部曲相保為
塹壘木樵樵與譙同謂為高樓以望敵也校聯不絕此校謂用木自相貫穿以為固者亦猶周易荷校滅耳也周禮校人掌王馬之政六廐成校蓋用關械闌養馬也說文解字云校木因也亦謂以木相貫遮闌禽獸也便兵弩飭關具蓬火幸通執及并力以逸待

勞兵之利者也臣愚以為屯田內有亡費之利外有守禦之備騎兵雖罷敵見萬人留田為必禽之具其土崩歸德宜不久矣從今盡三月敵馬羸瘦必不敢捐其妻子於它種中遠涉河山而來為寇又見屯田之士精兵萬人終不敢復將其累重還歸故地

累重謂妻子也累音力瑞切重音直

用切是臣之愚計所以度敵且必瓦解其處不戰而自破之策也至于敵小寇盜時殺人民其原未可卒禁臣聞戰不必勝不苟接刃攻不必取不苟勞衆誠令兵出雖不

能滅先零直能令敵絕不為小寇

直讀曰但

則出兵可也即

今同是而釋坐膝之道從乘危之執往終不見利空內

自罷敝

罷讀曰疲敝與弊同

貶重而自損非所以視蠻夷也又大

兵一出還不可復留湟中亦未可空如是繇役復發

也且匈奴不可不備烏桓不可不憂今久轉運煩費傾

我不虞之用以澹一隅

澹古澹字瞻給也

臣愚以為不便校尉

臨衆幸得承威德奉厚幣拊循衆羌諭以明詔宜

皆鄉風

鄉讀曰嚮

雖其前辭嘗曰得亡效五年宜亡它心不

足以故出兵臣竊自惟念奉詔出塞引軍遠擊窮天子之精兵散車甲於山野雖亡尺寸之功媮得避慙之便

媮苟且也
慙亦嫌字

而亡後咎餘責此人臣不忠之利非明主社

稷之福也臣幸得奮精兵討不義久留天誅罪當萬死陛下寬仁未忍加誅令臣數得熟計愚臣伏計熟甚不敢避斧鉞之誅昧死陳愚惟陛下省察充國奏每上輒下公卿議臣初是充國計者什三中什五最後什八有詔詰前言不便者皆頓首服丞相魏相曰臣愚不習兵

事利害後將軍數畫軍冊其言常是臣任其計可必用也帝於是報充國曰皇帝問後將軍上書言羌人可勝之道今聽將軍將軍計善其上留屯田及當罷者人馬數將軍強食慎兵事自愛帝以破羌強弩將軍數言當擊又用充國屯田處離散恐敵犯之於是兩從其計詔兩將軍與中郎將卬出擊強弩出降四千餘人破羌斬首二千級中郎將卬斬首降者亦二千餘級而充國所降復得五千餘人詔罷兵獨充國留屯田

元帝時置戊巳校尉屯田車師前王庭

戊巳中央鎮覆四方又開渠播

種以為職故稱戊巳時車師有前王後王國也

王莽遣尚書大夫趙並使勞北邊還言五原北假膏壤

殖穀

北假地名也膏壤言其土肥美也殖生也

異時常置田官乃以並為田

禾將軍發戍卒屯田北假以助軍

後漢光武建武五年馬援家屬隨隗囂質子恂歸雒陽

居數月而無它職任援以三輔地曠土沃而所將賓客

猥多乃上書求屯田上林中帝許之

六年討敵將軍王霸屯田新安

時太中大夫張純
將兵屯田南陽

七年詔驃騎大將軍杜茂引兵北屯田晉陽廣武以備

敵寇

廣武縣名
屬太原郡

明帝永平十六年北征匈奴取伊吾廬地今伊州置宜禾

都尉以屯田遂通西域于闐諸國

章帝建初二年復罷屯田伊吾廬

順帝永建元年復朔方西河上郡既而激河浚渠為屯

田省內郡費歲一億計遂令安定北地上郡及隴西金

城常儲穀粟令周數年內右扶風韓皓代馬賢為校尉
明年犀苦詣皓自言求歸故地皓復不遣因轉湟中屯
田置兩河間以逼羣羌皓後坐徵張掖太守馬續代為
校尉兩河間羌以屯田近之恐必見圖乃解仇詛盟各
自齎言備續欲先示恩信乃上移屯田還湟中羌意乃安
六年以伊吾廬膏腴之地傍近西域匈奴資之以為鈔
暴復令開設屯田如永元時事置伊吾司馬一人
陽嘉元年以湟中地廣更增置屯田五部復為十部復

置玄菟郡屯田六部

靈帝中平中傅燮為漢陽太守廣開屯田列置四十餘營

魏太祖初興值董卓之亂百姓流離穀石至五十餘萬人多相食既破黃巾欲經畧四方而苦軍食不足羽林監潁川襄祗及韓浩建置屯田議太祖乃下令曰自遭荒亂率乏糧穀諸軍並起無終歲之計饑則寇畧飽則棄餘瓦解流離無敵自破者不可勝數袁紹之在河



北軍人仰食桑椹袁術在江淮取給蒲羸民人相食州里蕭條公曰夫定國之術在於強兵足食秦人以急農兼天下孝武以屯田定西域此先代之良式也是歲騎

都尉任峻為典農中郎將乃募民屯田許下得穀百萬

斛於是開置芍陂屯田

芍音鵠今壽州

郡列置田官

淮南郡吏倉慈

為綏集都尉

數年中所在積穀倉廩皆滿官渡之戰軍國之

饒起於棗祗而成於任峻時太祖欲廣置屯田以司空掾國淵典其事淵屢陳損益相土處民計民置吏明功

課之法五年中倉廩豐實百姓競勸樂業

劉靖為鎮北將軍都督河北諸軍事修廣戾渠陵大堰水溉灌薊南北三更種稻邊民利之

梁習為并州刺史摠故部曲於上黨取大材供鄴宮室習表置屯田都尉二人領客六百夫於道次耕種菽粟以給人牛之費

齊王正始中司馬宣王秉政奏穿廣漕渠引河入汴溉東南諸陂始大佃於淮北初宣王欲廣田畜穀為滅吳

之資乃使鄧艾行陳項東至壽春艾以為田良水少不足盡地利宜開河渠引水澆溉以通漕運之道乃著濟河論以喻其指又以為昔破黃巾因為屯田積穀許都以制四方今三隅已定事在淮南每大軍征舉運兵過半功費巨億以為大役陳蔡之間上下田糧可省許昌左右諸稻田并水東下令淮北二萬人淮南三萬人分休且田且守水豐常收二倍於西計除衆費歲完五百萬斛以為軍資六七年間可積三千萬斛於淮上此則

十萬之衆五年食也以此乘敵無不剋矣宣王善之皆如艾計施行復以減賦之要在於積穀乃大興屯守廣開淮陽百尺二渠又修諸陂於潁之南北萬餘頃自是淮北倉庾相望壽陽至於京師農官屯兵連屬焉蜀後主建興中諸葛亮為丞相出師侵魏據五丈原每患糧不繼使已志不申是以分兵屯田為久駐之基耕者雜於渭濱居民之間而百姓安堵

吳大帝赤烏中新都都尉陳表吳郡都尉顧承各率所

領都人會佃毗陵男女各數萬口

晉安平王孚魏明帝時為度支尚書以關中連遭賊寇穀帛不足遣冀州農丁五千屯於上邽秋冬習戰陣春夏修田桑繇是關中軍國有餘待賊有備矣

扶風王駿武帝初為鎮西將軍都督雍梁等州勸督農桑與士卒分役已及僚佐并將帥兵士等人限田十畝具以表聞詔遣普下州縣使各務農事

羊祜為都督荊州諸軍事率營兵出鎮南夏時吳石城

守去襄陽七百餘里每為邊害枯患之竟以說計令吳
罷守於是戍邏減半分以墾田八百餘頃大獲其利枯
之始至也軍無百日之糧及至季年有十年之積

東哲太康中為張華司空賊曹屬時欲廣農哲上議曰
伏見詔書以倉廩不實關右饑窮欲大興田農以蕃嘉
穀此誠有虞戒大禹盡力之謂然農穰可致所繇者三
一曰天時不愆二曰地利無失三曰人力咸用若必春
無霖霖之潤秋繁滂沱之患水旱失中雪穰有請雖使

義和平秩后稷親農理疆畝於原隰勤蔗菘於中田猶
不足以致倉庾盈億之積也然地利可以計生人力可
以課致詔書之旨亦將欲盡此理乎今天下千城人多
游食廢業占空無田課之實較計九州數過萬計可申
嚴此防令監司精察一人失課負及郡縣此人力之可
致也又司州十郡土狹人繁三魏尤甚而猪羊馬牧布
其境內宜悉破廢以供無業業少之人雖頗割徙在者
猶多田諸苑牧不樂曠野貪在人間故謂北土不宜畜

牧此誠不然案古今之語以為馬之所生實在冀北大
賈詳羊取之清渤放豕之歌起於鉅鹿是其效也可恣
徙諸牧以充其地使馬牛豬羊齧草於空虛之田游食
之人受業於賦給之賜此地利之可致者也昔騅駟在
坰史克所以頌魯僖却馬務田老氏所以稱有道豈利
之所以會哉又如汲郡之吳澤良田數千頃貯水停滂
人不墾植聞其國人皆謂通泄之功不足為難瀉鹵成
原其利甚重而豪強大族惜其魚蒲之饒搆說官長終

於不破此亦谷口之謠載在史篇謂宜復下郡縣以詳
當今之計荆揚充豫汙泥之土渠塢之宜必多此數最
是不待天時而豐年可獲者也以其雲雨生於畚耜多
稔生於決泄不必望朝隲而潢潦臻蒙山川而霖雨息
是故兩周爭東西之流史起惜漳渠之浸明地利之重
也宜詔四州刺史使謹案以聞又昔魏氏徙三郡人在
陽平頻邱界今者繁盛合五六千家二郡田地逼狹謂
可徙還西州以充邊土賜其十年之復以慰重遷之情

一舉兩得外實內寬增廣窮人之業以闢西郊之田此
又農事之大益也

荀崧為北中郎將徐州刺史監徐兗二州揚之晉陵軍
事北鎮淮陰屯田于東陽之石龜

殷浩為中軍將軍北征許雒開江西畝音劉田千餘頃以

為軍儲

元帝為晉王課督農功詔二千石長吏以入穀多少為
殿最其非宿衛要任皆宜赴農使軍各自佃作即以爲

廩

後趙石季龍謀伐昌黎使典農中郎將王典率衆萬餘屯田於海濱自幽州東至白狼大興屯田

宋毛修之為冠軍將軍領南郡相高祖將伐羌先遣修之復芍陂起田數千頃

王弘為會稽王司馬道子驃騎參軍主簿時農務頗息末役繁興弘以為宜建屯田陳之曰近面所諮立屯田事已具簡聖懷南畝事興時不可失宜早督田畷以要

歲功而府資役單刺控引無所雖復厲以重勸肅以嚴
威適足令囹圄充積而無救於事實也伏見南局諸治
募吏數百雖資以廩贍收入甚微愚謂若廻以配農必
功利百倍矣然軍器所須不可都廢今欲留銅官大冶
都邑小冶各一所重其功課一隄揚州州之求取亦當無
之餘者皆罷之以充東作之要又欲二局田曹各立典
軍募吏依冶比例并聽取山湖人此皆無損於私有益於
公者也其中亦應疇量分判畚假及給廩多寡少自可一

以委之本曹親局所統必當練悉且近東曹板水曹叅
軍納之領此任其人頗有幹能自足了其事耳頃年以
來斯務弛廢田蕪廩虛實亦繇此弘過蒙飾擢志輸
短効豈可相與寢默有懷弗聞耶至於當否尊自當裁
以遠鑒若所啓謬允者伏願便以時施行庶幾有務農
之勤倉有盈廩之實禮節之興可以垂拱待也

南齊桓崇祖為豫州刺史平西將軍明帝使入關叅敵
消息還勅崇祖曰卿視吾是守江東而已邪所少者食

卿但努力營田自然平殄殘醜遂勅崇祖修治芍陂田
祖冲之為長水校尉領冗從僕射冲之造安邊論欲開
屯田廣農殖明帝建武中使冲之巡行四方興造大業
可以利百姓者會連有事竟不行

徐孝嗣建武末為尚書令是時連年虜動軍國虛乏孝
嗣表立屯田曰有國急務兵食是同一夫輟耕於事彌
切故井陌疆里長轂成於周朝屯田廣置勝戈富於漢
室降此已還詳畧可見但求之自古為論則賒即以當

今宜有要術竊尋綠淮諸鎮皆取給京師費引既殷漕
運艱澀聚糧待敵每苦不周利害之基莫此為急臣比
訪之故老及經彼宰守淮南舊田觸處極目陂遏不修
咸成茂草平原陸地彌望尤多今邊備既嚴戍卒增衆
遠資餽運近廢良疇士多饑色可為嗟嘆愚欲使刺史
二千石躬自履行隨地覈其闕精尋灌溉之源善商肥確
之異州郡縣戍主帥已下悉分番附農今水田雖晚方
事菽麥二種益是北土所宜彼人便之不減粳稻開創

之利宜在及時所啓允合請即使至徐充司豫爰及荆
雍各當境規度勿有所遺別立主曹專司其事田器耕
牛臺詳所給歲終言最明其刑賞此功克舉庶有弘益
若緣邊足食則江南自豐權其所饒畧不可計奏御見
納時帝已寢疾兵事未已竟不施行

梁陳慶之為都督南北司豫諸軍事罷義陽鎮兵停陸
轉運江湖諸州並得休息開田六千頃二年之後倉廩
充實高祖每嘉賞之

夏侯夔為豫州刺史時積歲寇戎人頗失業夔乃帥軍人於蒼陵立堰溉田千餘頃歲收穀百餘萬石以充儲備兼贍貧人境內賴之

裴邃為竟陵太守開置屯田公私便之後又為西戎校尉北梁秦二州刺史復開創屯田數千頃倉廩盈溢省息邊軍民人吏獲安

後魏東平公儀奉王翰之子道武命督屯田於河外自五原至稠陽外務農稼大得人心

薛虎子為開府徐州刺史時州鎮戍兵資絹自隨不入
公庫任其私用常苦饑寒虎子上表於孝文曰臣聞金
湯之固非粟不守韓白之勇非糧不戰故自用兵已來
莫不先積聚然後圍并兼者也今江左未賓鯨鯢待戮
若不委粟彭城以強豐沛則何以拓定江關掃一衡霍
竊惟在鎮之兵不減數萬資糧之絹人十二疋即目隨
身用度無準未及代下不免饑寒論之於公無毫釐之
潤語其私則橫費不足非所謂納民軌度公私相益也

今徐州左右水陸壤沃清汴通流足盈灌溉其中良田
十萬餘頃若以兵絹市牛分減戍卒計其牛數足得萬
頭興力公田必當大獲粟稻一歲之中且給官食半兵
芸殖餘兵尚衆且耕且守不妨捍邊一年之收過於十
倍之絹暫時之耕充於數年之食於後兵資唯須內庫
五稔之後穀帛俱溢匪直戍士有豐飽之資於國亦有
吞敵之勢昔杜預田宛葉以平吳充國耕西零以強漢
臣雖識謝古人任當邊守庶竭塵露有增山海孝文納

之

范紹為寧遠將軍義陽太守時朝廷有南討之計發河
北數州田兵二萬五千人通緣淮戍兵合五萬餘人廣
開屯田八座奏紹為西道六州營田大使加步兵校尉
紹勤於勸課頻歲大獲

宋弁為黃門郎隨車駕南討詔弁於豫州都督所部及
東荆潁鄴皆減戍士營農水陸兼作

杜纂為積弩將軍既平南陽又詣赭陽武陽二郡課種

公田隨供軍費

北齊斛律羨為幽州道行臺僕射導高梁水北合易京東會於潞因以灌田邊儲歲積轉漕用省公私獲利焉
嵇暉孝昭皇建中為平州刺史暉建議開幽州督亢舊陂長城左右營屯歲收稻粟數十萬石北境得以周贍又於河內置懷義等屯以給河南之費自是稍止轉輸之勞

隋郭衍文帝開皇中為朔中總管所部有常安鎮北接

蕃境常勞轉運行乃選沃饒地置屯田歲剩粟萬石民免轉輸之勞

趙仲卿為朔州總管開皇三年突厥犯塞吐谷渾寇邊軍旅數起轉輸勞弊帝乃令仲卿於長城已北大興屯田以實塞下又於河西勒百姓立堡營田積穀京師置常平監

煬帝大業中劉權從征吐谷渾帝令權過曼頭赤水置河源郡積石鎮大開屯田留鎮西境

唐高祖武德初竇靜為并州大總管府長史時突厥為邊患師旅歲興軍糧不屬靜上表請於太原多置屯田以省餽運議者以人物凋零不宜動衆書奏不省靜復上書辭甚切於是徵靜入朝與裴寂蕭瑀封德彝等爭不能屈竟從靜議歲收數十萬斛高祖善之六年秦王又奏請益置屯田於并州界高祖從之

竇軌為益州道行臺左僕射擊臨洮羌破其部衆軌度羌胡終為後患於松州置屯田以備後舉

太宗貞觀初張儉為朔州刺史廣營屯田歲致穀十萬斛邊糧益饒及遭霜旱儉勸百姓相贍遂免饑餒州境獨安

張公謹為代州都督上表請屯田以省轉運

高宗顯慶中劉仁軌為帶方州刺史鎮守百濟於是漸營屯田積糧撫士以經畧高麗

則天天授初婁師德為檢校豐州都督知營田事則天下書勞曰卿受委北垂總司軍任往還靈夏檢校屯田

收粟既多京坻遽積不煩和糴之費無復輸運之艱兩軍及其鎮兵數年咸得支給勤勞之誠久而彌著覽以嘉尚忻悅良深長壽元年召拜夏官侍郎判尚書事明年拜鳳閣鸞臺平章事則天謂師德曰王師外鎮必藉邊境營田卿須不憚劬勞更充使檢校又為河源積石懷遠等軍及河蘭鄯廓等州檢校營田大使

郭元振長安中為涼州都督隴右諸軍州大使元振令甘州刺史李漢通開置屯田盡其水陸之利舊涼州粟

麥斛至數千及漢通牧率之後數年豐稔遂斛至數十錢積軍糧可支數十年

中宗時王暉為桂州都督桂州舊有屯兵常運衡永等州糧以饋之暉始改築羅郭奏罷屯兵又堰江水開屯田數千頃百姓賴之

玄宗開元二十五年夏四月庚戌詔曰陳許豫壽等四州本開稻田將利百姓度其收穫甚役功庸何如分地均耕令人自種先所置屯田宜并定其地量給逃還及

貧下百姓

代宗大歷五年詔諸州置屯田並停特留華同澤等三州屯乃悉以度支之務委于宰臣

李承大歷末為淮南淮西黜陟使奏於楚州置常豐堰以禦海潮屯田墾鹵歲收十倍至德宗初嚴郢為京兆尹宰相楊炎不習邊事請於豐州屯田發關輔人開陵陽渠人頗苦之郢嘗從事朔方曉其利害乃具五城舊屯及募兵倉儲等數奏曰按舊屯沃饒之地今十不耕

一若力可墾闢不俟浚渠其諸屯水利可種之田甚廣
蓋功力不及因致荒廢今若發兩京關輔人於豐州浚
渠營田徒擾兆庶必無其利臣不敢遠引他事請以內
園植稻明之且秦地膏腴田稱第一其內園丁皆京兆
人於當處營田月一替其易可見然每人月給錢八千
糧食在外內園使猶僦募不占奏令府司集事計一丁
歲當錢九十六千米七斛二斗計所僦丁三百每歲合
給錢二萬八千八百貫米二千一百六十斛不知歲終

收獲幾何臣計所得不補所費況二千餘里發人出塞
屯田一歲方替其糧穀從太原轉餉運直至多又每人
須給錢六十三千米七斛二斗私出資費數又倍之據
所收必不登本而關輔之人不免流散是虛畿甸而無
益軍儲與天寶已前屯田事殊臣雖至愚不敢不熟計
惟當省察疏奏不報郢又上奏曰伏以五城舊屯其數
至廣臣前已挾名聞奏訖其五城軍士若以今日所運
開渠之糧貸諸城官田至冬輸之又以所送開渠功直

布帛先給田者至冬令據時估輸穀如此即關輔免於徵發五城豐厚力農闢田比之浚渠十倍之利也時上方用事郢議不省卒開陵陽渠而竟棄之

劉怱為雄武軍使廣屯田節用以辦理稱

李元諒貞元中為隴右節度於涇州及良原收軍田粟數萬石初將刈獲涇原節度劉巨遣兵數千屯於潘原以御蕃寇自是邊軍頗有積儲

李復為義成軍節度使請於白馬衛南置屯田數百畝

以資軍食時人悅之

孟元陽起於陳許軍中理戎整肅勤公事善部署曲環之為節度使元陽為大將環使董作於西華屯元陽盛夏芒屨立稻田中須役者退而後就舍故其田無歲不稔軍中足食

憲宗元和三年六月以東都防禦使舊苑內營田六百五十頃至六年令河南府收管營種歲終具所得聞奏其營田兵罷之

穆宗以元和十五年正月即位二月詔諸道除邊軍營田處其軍糧既取正稅米分給其所管田自為軍中資用不合取百姓營田并以墾地廻換百姓肥濃地其軍中如要營田任取食糧健卒而不得輒妄招召

敬宗長慶四年七月靈武節度使奏於特進渠新置營田六百頃

寶歷元年楊元卿為滄景節度使詔以所置屯田有裨國用命兼充當道營田使是冬元卿上言營田收廩粟

二十萬斛請付度支充軍糧

崔弘禮為河陽節度使上言於秦渠下闢荒田三百頃
歲收粟二萬斛從寶歷二年減去度支所給數

文宗太和中殷侑為滄齊德等州觀察使上言當管河
北兩州百姓耕牛見管戶一萬三千六百九十四除老
弱單獨外其間大半力堪營種去年綠無耕牛百姓掘
草根充糧一年虛過饑餓相繼轉死道路臣去年躬親
勸責酌量人力於一萬三千戶內每戶請牛一具支絹

綾五疋計三萬疋餘二千戶不得牛營田不敢不奏詔
曰滄州營田已有次第耕牛欠數頻有奏論方及春農
實資濟恤宜更賜綾絹一萬疋其來年將士糧米便勒
本道自供

六年二月戶部尚書判度支王起奏靈武邠寧田土寬
廣又復肥濃悉堪種蒔承前但逐年旋支錢收糶悉無
貯積與本道計會立營田從之

七年四月以宣武軍先置營田別加田卒至是勅罷其

卒計所停糧五萬七千餘斛節度使楊元卿奏請於營田頃畝之內加稅小麥三萬九千餘斛以代給其糧而留其卒詔許之

開成元年三月戊午度支奏請停京西營田

武宗會昌六年五月赦節度靈武天德三城封部之內皆有良田綠無居人久絕耕種自今已後天下囚徒合處死刑憤非巨蠹者特許生全并家口配流此三道仍令本軍鎮各收管安存兼接借農具務使耕植

宣宗大中三年八月勅曰原州威州秦州武州並六關
訪聞土地肥饒水草豐美如有百姓要墾闢耕種五年
內不加稅賦五年後量定戶籍便為永業其京城有犯
事合流役囚徒從今後一切配十處收管者十處者謂
原州秦州威州武州驛藏關石門關木峽關六盤關制
勝關石峽關

後唐莊宗同光三年三月西京奏制置三白渠起置營
田務一十一

明宗天成二年八月戶部員外郎知詔誥于嶠上言請
邊上兵士起置營田數趙充國諸葛亮之術庶令且戰
且耕望致輕徭

十二月左司郎中盧損上言以今歲南征運糧糜費唐
鄧復郢地利膏腴請以下軍官健興置營田庶減民役
以備軍行

長興元年七月前洋州節度副使程文徽陳利見請於
瀛莫兩州界起置營田以備邊因授文徽莫州刺史充

兩州營田使

晉張希宗為靈州兩使留後先是州界與戎人交處每
歲以戍兵運糧經五百里有剽攘之患希宗及開故屯
田諭邊士使播種軍食大濟爾玉書褒之因正授戎節

冊府元龜卷五百三